

- 7 Staðfesting ríkisstjóra á skipulagsskrá fyrir sjóð til eflingar á rannsóknum á
9. jan. lækningakrafti íslenzkra heilsulinda, útgefin á venjulegan hátt að mandatum af
dóms- og kirkjumálaráðherra 9. janúar 1942.
Skipulagsskráin er þannig:

SKIPULAGSSKRÁ

fyrir sjóð til eflingar á rannsóknum á lækningakrafti íslenzkra heilsulinda.

1. gr.

Sjóðurinn er stofnaður af hjónunum Sesselju Guðmundsdóttur og Bjarna Jóns-
syni frá Galtafelli, í minningu dætranna Svövu og Kristjónu Áslaugar.

2. gr.

Stofnfé sjóðsins er 10000 — tíu þúsund — krónur, er afhendist í veðdeildarbréf-
um 12. flokks, 10 bréf Litra A 78, 79, 80, 81, 82, 83, 84, 85, 86 og 87, hvert að upphæð
1000 kr. ásamt vaxtamiðum frá 1. júlí 1940. Sjóðstjórninni ber að sjá um að bréfin
verði skrásett á nafn sjóðsins.

3. gr.

Tilgangur sjóðsins er að efla rannsóknir á lækningakrafti íslenzkra heilsulinda,
hvers kyns sem eru, svo sem heitar og kaldar uppsprettur, jarðefni, loftslag og geisla,
og má verja $\frac{3}{4}$ — þrem fjórðu — hlutum vaxtanna af sjóðseigninni árlega til þess
að styrkja íslenska vísindamenn til rannsókna á ofangreindum heilsulindum og leið-
beininga á notkun þeirra, til alþjóðarheilla.

Rannsóknir þær, er til greina kemur að styrkja úr sjóðnum, geta verið efnafræði-
legar, jarðfræðilegar, eðlisfræðilegar eða læknisfræðilegar, og sem annaðhvort eru
sjálfstæðar rannsóknir einstakra vísindamanna eða framkvæmdar í samráði við
stjórn sjóðsins, er hún semur drög að fyrirkomulagi á almennum rannsóknum á
lækningakrafti íslenzkra heilsulinda.

Sá, er styrks nýtur, skal láta sjóðstjórninni í té skýrslu um rannsóknir sínar,
ekki síðar en einu ári eftir að hann hefur notið styrksins.

4. gr.

Styrkur úr sjóðnum úthlutast einu sinni á ári, í fyrsta skipti árið 1941. Komi
það fyrir, að stjórn sjóðsins telji enga umsækjendur eitthvert ár verðuga til styrks,
geymist sá styrkur til næsta árs og úthlutast þá ásamt með þess árs styrk.

5. gr.

Stjórn sjóðsins ákveður fyrirkomulag á umsóknum og um það, hvenær á árinu
styrknum er úthlutað. Kostnaður sá, er verða kann í sambandi við úthlutun styrks-
ins, dregst frá þeirri upphæð, er kemur til úthlutunar árlega.

6. gr.

$\frac{1}{4}$ — einn fjórði — hluti vaxtanna af sjóðseigninni árlega leggst jafnan við höfuð-
stólinn og er það von gefendanna, að sjóðurinn megi aukast með gjöfum annars
staðar að, til frekari eflingar þarflegu málefni. Fé, sem sjóðnum þannig áskotnast,
leggist við höfuðstólinn og sé því varið á sama hátt og honum, nema gefendur þess
ákveði annað.

Reiðufé sjóðsins skal leggja á sparisjóð undir nafni hans og því verja til kaupa
á veðdeildarbréfum eða ríkisskuldabréfum þegar upphæðin nær 1000 kr., og má aldrei
ráðstafa sjóðseigninni á annan hátt.

7. gr.

7

Stjórn sjóðsins skipa 3 menn, þannig: Tveir menn, er Vísindafélag Íslendinga tilnefnir, og er þriðji maður í stjórninni Bjarni Jónsson frá Galtafelli meðan hann lifir, en síðan einhver afkomenda gefendanna. Fari svo, að Vísindafélag Íslendinga verði lagt niður og autt verði sæti í stjórninni, er félagið hefur skipað, gengur sjóðurinn undir umsjá læknadeildar Háskóla Íslands, er þá kemur í stað vísindafélagsins.

Fari svo að enginn afkomandi Bjarna Jónssonar sé lengur til, eða ekki verði til hans náð, skipar vísindafélagið eða síðar læknadeildin, alla stjórnendurna.

8. gr.

Sjóðstjórnin skiptir sjálf með sér verkum og ber fyrstu stjórn sjóðsins að sjá um, að skipulagsskrá þessi öðlist staðfestingu.

9. gr.

Reikningar sjóðsins skulu árlega birtir í B-deild Stjórnartíðindanna, og teljast til þeirra reikninga, er vísindafélagið (eða læknadeildin, ef til kemur) semur árlega og skulu háðir sömu endurskoðun og um slíka reikninga gildir á hverjum tíma.

AUGLÝSING

8

19. jan.

um undanþágu frá ákvæðum reglugerðar, dags. 9. okt. 1940, um skyldu skipa og flugfara til að koma á tilteknar hafnir eða hafnarstaði til þess að fá fyrstu og síðustu afgreiðslu hér á landi.

Á tímabilinu 15. janúar til 30. apríl þ. á., að báðum dögum meðtöldum, geta fær-
eysk skip, sem flytja frystan eða ísvarinn fisk til Bretlands, fengið fyrstu og síðustu
afgreiðslu á Hornafirði.

Skipin mega enga farþega flytja.

Fjármálaráðuneytið, 19. janúar 1942.

F. h. r.

Magnús Gíslason.

Einar Bjarnason.

AUGLÝSING

9

20. jan.

um breyting á reglum um fjörefnablöndun smjörlikis, nr. 41. 27. apríl 1935.

Frá 1. febrúar þ. á. skal smjörliki innihalda það fjörefnamagn, sem ákveðið var með auglýsingu nr. 14 13. janúar 1941, um breyting á reglum um fjörefnablöndun smjörlikis frá 27. apríl 1935.

Jafnframt fellur úr gildi auglýsing frá 11. október 1941, sem heimilaði að láta úti fjörefnalaust smjörliki.

Atvinnu- og samgöngumálaráðuneytið, 20. janúar 1942.

Jakob Möller.

Páll Pálmason.